

Inatsisartunut Naalackersuisunullu il.il. ilaasortat aningaasarsiaqartitaanerat il.il. pillugit Inatsisartut inatsisaani § 6 imm. 6 naapertorlugu Naalackersuisut allanngueqqullugit, Naalackersuisut peqquneqarnissaannik Inatsisartut aalajangiiffigisassaattut siunnersuut, taamaasilluni Naalackersuisunut ilaasortat ulloq 1. januar 2016 aallarnerfigalugu Namminersorlutik Oqartussat atorfirmut atasumik pinngitsoorani inigisassatut inigitittagaanni ineqarnermut akiliutinik naatsorsuisarnermi maleruagassat qaqugukkulluunniit atuuttut 100 %-iinik ineqarnermut akiliuteqartalersillugit.

Inatsisartuni ilaasorta, Tillie Martinussen, Demokraatit

Akissuteqaat

(Naalackersuisut Siulittaasuat)

Siullermeerneqarnera

Aallarniutigalugu Naalackersuisut Inatsisartunut ilaasorta Tillie Martinussen, Demokraatit aalajangiiffigisassatut siunnersuutaanut qujassuteqarfigissavaat. Tamanna nalilersuinissamut pissutissaqartitsilerpoq, Naalackersuisunut ilaasortat ineqarnermut akiliuteqartarnerini malittarisassat ullutsinnut naleqquttuunersut pillugit.

Aalajangiiffigisassatut siunnersuutip Inatsisartuni suliarineqarnissaanut atugassamik Naalackersuisunit inussiarnersumik erseqqissaatigineqarsinnaavoq, Naalackersuisunut ilaasortat ineqarnermut akiliuteqartarnerini malittarisassat atuuttut Inatsisartuni ilaasortanit tamarmiusunit 2011-imi aningaasarsiaqartitsisarnermik inatsisip allanngortinneqarnerani akuersissutigineqarnikummata Inatsisartunillu uppersarsarneqarnikuullutik juni 2015-imi kingullerpaamik aningaasarsiaqartitsisarnermik inatsisip allanngortinneqarnerata atuuttussanngortinneqarnerani.

Naalackersuisunut ilaasortat ineqarnermut akiliuteqartarnerini malittarisassat aningaasarsiaqartitsisarnermi inatsimmi § 6, imm. 6-imi nassaarineqarsinnaapput. Naatsumik oqaatigalugit imaapput, Naalackersuisunut Ilaasortat Namminersorlutik Oqartussat atorfirmut atasumik pinngitsoorani inigisassatut inigitittagaanni ineqarnermut akiliutinik naatsorsuisarnermi maleruagassat qaqugukkulluunniit atuuttut 60 %-iinik ineqarnermut akiliuteqartassasut. Naalackersuisunut ilaasortat ineqarnermut akiliuteqartarnerini malittarisassat toqqammaveqarput Inatsisartut Suleriaasiat pillugu Inatsisartut Ataatsimiititaliaanit siunnersuummit. Siunnersuutip saqqummiunneqarnerani, Inatsisartunut siulittaasup ataatsimiititaliaq sinnerlugu ilaatigut erseqqissaatigaa, Naalackersuisunut ilaasortat ineqarnermut akiliuteqartarnerini malittarisassat nutaat pillugit siunnersuut ineqarnermut akiliutaasartumit qaffatsitsinerussamat kiisalu malittarisassatigut nutaatigut qulakkeerneqassamat ineqarnermut akiliut ingerlaavartumik akit ineriartornerat malillugu iluarsineqartassasoq, soorlu tamanut ineqartitsisarnermi atorneqartutut.

Ilanngullugu inatsisissatut siunnersuummut oqaaseqaatini oqaatigineqarpoq, siunnersuutikkut aningaasartuutaasartut mianeriniarneqassasut, tassalu Naalackersuisunut ilaasorta Nuup avataani allamik ineqarsimassamat, kiisalu ineqarnermi ilassinnittarnikkut pisussaaffeqartitaanerup aningaasartuutaanera matussuserneqartartussaamat.

Ilanngullugu erseqqissaatigineqarpoq, Suleriaaseq pillugu Ataatsimiititaliamit nalinginnaasumik ineqarnermut akiliuteqartarnissamik siunnersuut tapersorsorneqarsinnaanngimmat, tassami Naalakkersuisunut ilaasortat inissiamut allamut aningaasartuuteqartarsinnaammata imaluunniit assersuutigalugu qitornanut ineqartitsinermit, taakku ilinniagaqarneq pissutigalugu Nuummumt nuussinnaanngitsut. Aammattaaq piareersimaffigineqassaaq sivikitsumik nalunaarfigineqarlutik inissiap qimattariaqalersinnaanera.

Siunnersuummut 2011-imi akuersissutigineqartumut ataatsimiititaliap isumaliutissiissutaatigut takuneqarsinnaavoq, ilaatigut Suleriaaseq pillugu Ataatsimiititaliamit malittarisassat nutaat maannakkullu atuuttut isigineqarmata manna tikillugu malittarisassaasunik nutarterinertut aamma malittarisassatigut ilaatigut siunertarineqarmat Naalakkersuisutut atuunnermi eqqarsaatigineqassammat Naalakkersuisut ineqarnermut akiliutit annertussusaannik erloqitinneqassanngimmata, akisussaaffeqarluartumik atuuf-fiup qanoq ittuuneranut naapertuutinngitsunik.

Naggasiullugu oqaatigineqassaaq, Suleriaaseq pillugu Ataatsimiititaliamit oqaatigineqarnikummat, ineqarnermut akiliummut attuuffik pissutigalugu innersuussutigineqartumut 100%-imik akiliuteqartitsisarnissamik kissaammumt, ataatsimiititaliap isummernerigaa, ineqarnermut akiliutip oqallisigineqarnera ingerlanneqarsinnaanngimmat marloriaammik ineqarnermut/illoqarnermi akiliuteqartarnermi mianerisassat isiginiarnagit, aammalu taamatut isigininneq sianiginiarneqartussaammat.

Suleriaaseq pillugu Ataatsimiititaliap isumaliutissiissummini erseqqissarpaa, ataatsimiititaliap oqallisiginninnermini naammagisimaarlugu paasisimagaa, tamakkiisumik ajornartorsiornermut isummer-simanerup tassalu ineqarnermut akiliummik maannakkut naatsorsuisimaneq qaqugukkulluunniit atuuttoq ineqarnermut 60%-imik akiliuteqarnissamik siunnersuutip saqqummiunneqartup taperserneqarsinnaanerani kinguneqarsinnaammat. Allatut oqaatigalugu ataatsimiititaliap isumaqatigiittup, ineqarnermut akiliut pillugu malittarisassat maannakkut atuuttut pillugit inassutigineqartoq Inatsisartunit akuerneqartussatut inassutigisimagaa.

Tamatuma kingornatigut ulloq 8. april 2011-mi Inatsisartunit tamarmiusunit siunnersuut akuersissutigineqarpoq.

Soorunami Naalakkersuisunit maluginiarneqarsimavoq, Demokratinit nalunaarutigineqartumit pineqarsimammat, partiimit takorusunneqarnerummat Naalakkersuisunut ilaasortat inissiamik inissarsisinneqarlutik najugaqartut 100%-imik ineqarnermut akiliuteqartarnissaat. Peqatigitillugu Naalakkersuisunit maluginiarneqarsimavoq, malittarisassat maannakkut atuuttut Inatsisartunit tamarmiusunit ataatsimoorussamik isumaqatigiiffiusumillu aalajangermik toqqammaveqarmata kiisalu Inatsisartuni siamasissumik isumaqataaffigineqarmata eqqarsaatersuutit, ineqarnermut akiliutit pillugit malittarisassanit maannakkut atuuttunit toqqammavigineqartut.

Naalakkersuisut isummernerimmassuk ineqarnermut akiliutinut malittarisassani atuuttuni toqqammavilersuutitigut allanngortitsisoqarsimannngitsoq, Naalakkersuisut inassutigissavaat 2011-mi malittarisassat Inatsisartunit akuersissutigineqartut ukioq manna upernaakkut katersuunnermi uppersarneqartut, suli atuutsinneqassat.

Tamanna tunngavigalugu Naalakkersuisunit aalajangiiffigisassatut siunnersuut saqqummiunneqartoq tapersorsorneqarsinnaanngilaq.

Taamatut Naalakkersuisut oqaaseqaateqarlutik qilanaarivaat siunnersuutip saqqummiunneqartup Inatsisartuni suliarineqarnissaa.